



# LUNG KEREH TAM KAYAN

borneo literature bureau

# Lung Kereh Tam Kayan



# Lung Kereh Tam Kayan

*Kenan*

James Luhut Wan Ding



BORNEO LITERATURE BUREAU

©BIRO KESUSASTRAAN BORNEO, 1974  
(dianjurkan oleh Kerajaan-Kerajaan Negeri Sarawak dan Sabah)  
Jalan Tun Haji Openg,  
Kuching, Sarawak,  
Malaysia.

PERPUSTAKAAN KERP. SAR	
No. Buku	
No. Pelanggan	
Tarikh	

Dicetak oleh

by The Vanguard Press Sdn. Bhd. Kuching, Sarawak.

# Ket Halem

## Li'ap

Lake' Beruk Utun ..... 1

Lake' Si Dawa' Lake' Tela'uh ..... 8

Ditut Ali Lung ..... 16

# LAKE' BERUK UTUN

TE' NAH JI HANGUN, te' nah lake' Beruk tih, Beruk Utun aleng bekek ikoh kurin daha' tih. Lake' beruk nih murip te' luman dahin te' tuvuh uve' kelunan tua nah iha'. Te' nah Lebui dawa' hawan na' Duyu tih, luman dawa' lim nah aleng en Beruk Utun anih te' lahu.

Lake' Beruk nih, jam lelan iha' mete' peluvat kelunan, nurei pah daha' beruk aleng dahin na' alem uro' tih lahu. Tana' nah luman kelunan tih tei henung uk', tei nah iha' pekamang tua, mete' kani bua ketinun te' alem luman daha' tih. Malei lan nah beruk anih murip te' lirin luman kelunan tih. Tana' nah tegu lepau tei henung lahu, mete' pekamang tua nah iha' tepurung tei pala lepau tih, tei ilau ket aleng marung en na' kani tinan. Awi iha' te' pesuk mejam dapi masik dahin sihei aleng en daha' lo' ujung paha' tih, pah lanih nah kenan na'.



Te' nah ji hangun, luman Lebui dawa' Duyu tih sayu lan bua na', ngelu'an lan nah dawa' ngelunau na' lahuh. Luman dawa' tegu jaka' anih, jeleng ha' lirin tu'an tih iha' te'. Awi aleng layau lim kah lahuh, tinan luman daha' te', tinan kah Beruk Utun anan murip. Tana' nah tegu Lebui dawa' hawan na' tih ngelunau luman dawa' tih, men jehima ateng lidem tih dawa' mete', avin dawa' ngelu'an te' bua parei dawa' tih. Nurei pah dawa' timah seng pek'uh nah lahuh, ala dawa' nyi'an na hadui aleng beh. Nei kah dau tih hanit lasu na' ke', tei kah dawa' ngelarah ha' lirin luman dawa' tih. Nunan-nunan nah dawa' na hadui dawa' tih. Te' pah lumandawa' nah lahuh, su lan pah hang na' dahin luman daha' aleng jeleng te' beh dawa'. Dep su nutih tua nah dawa' hawan na' nan dih. Awi te' marung kan dawa' nan dih, te' loh nah lake' Lebui tihteitusah uk henoh kenep na' pelemana' ket aleng nutih. Ngenep dawa' kuman bavui ha' nih, awi jam masik ha' nunan, melei uk nah Lebui tih tei ala na' men dawa'. Te' pah Lebui nih haman lan pah iha' nyeput lahuh.

Nunan-nunan nah Lebui nih dih, mete' tei panau alem uro' tih, tei alem tu'an'tei ilau tulan. Nunan tutek ha' tei, nunan kah tutek Duyu tih melek dep ha' luman dawa' nan dih.

Te' nah ji dau, lunau dawa' nan dih uh jeleng seng lepek nah. Lun ken Lebui tih nah men

Duyu hawan na' tih, "Duyu ju deng kah ika' pek'uh luma' anih dep te' alem dua' telo' dau anih na'a. Akui seng tei san alem tu'an aleng anih, tei pekalei dawa' aso' ong anih, pelalau tei ilau wei uk lahuu".

Uh anan dih, leka' nah Lebui tih. Te' nah be' kaleng nguyo' na' tih, en na' navei nah heput na' nandihteingileh hida nawi aso' na' tih lahuu. Melek dep nah Duyu nan dih ha' luman dawa' nan, pek'uh lunau dawa' aleng melek uk anan dih.

Pah nah lunau dawa' nah dih, tei nah Duyu tih pelalau mejat wei te' lirin luman dawa' tih, ngavan na' na kaleng dawa'. Te' lirin luman dawa' tinan nah Duyu nan pesuk lake' Beruk nan dih. Malei lan pah lake' Beruk nan dih, em te' loh ha' kaseh tei lap Duyu nan dih. Avin batung lake' Beruk nan dekaya' nunan, Duyu tih em te' loh apan na' seng tei muga' beruk anan lap. En Duyu tih nyineng Beruk anan dih malei lan nunan, ngenep lan pah iha' tei jeleng, tei mupuh-mupuh bulun lake' Beruk tih. Tei malei-malei nah lake' Beruk tih dahin Duyu nan dih.

Te' nah ji dau, tei nah Duyu tih ha' lirin luman dawa' tih ngelua', tei ilau wei, pesuk na' loh kah lake' Beruk nan dih tinan. Nunan kah iha' loh, en na' gem-gem kah lake' Beruk





tih. Leka' Duyu nan men ngavan na' nan dih beka' en lake' Beruk nan ngioh ha'. Tei te' lirin luman dawa' tih dih en lake' Beruk apuh Duyu nan dih, dahin en na' pahadui tinan tua nah iha'.

Nei nah Duyu tih uli ha' lepau dawa' tih, geri wei kelan na' anan dih, pa'en tua nah iha' pelemana' lake' Beruk nan dih. Nunan lim kah lake' Beruk nan dih lahuh pesegut tua nah iha' nei jeleng lepau dawa' Duyu nan dih. Te' pah ji hangun, tei nah Duyu tih leva, en lake' Beruk tih apuh te' alan tih tua pah Duyu tih. Nunan-nunan nah lake' Beruk tih paget mavang Duyu nan dih.

Te' nah jehima ji, uli nah Lebui nan dih men alem tu'an tih, nei geri ket aleng kelan na' nan dih uli. Te' alem iha' nunan dih, kitan lake' Beruk tih nah Lebui nan dih uh uli, nusi' nan iha' kaseh nei jeleng lepau dawa' nan dih la'an. Te' nah nunan dih, Duyu nan dih huk tua nah hadui aleng en na' na dahin lake' Beruk nan men Lebui nan.

Te'-te' nah dawa' nunan dih, awi urip dawa' aleng layau pa'en kah dawa'. Lebau nah bulan ji-tula nah ali Duyu nan dih. Lebui nan dih, sayu lan nah kenep na' nyineng Duyu tih uh nei mali nutih, avin kuri-kuri dara dawa' hu'uh peji nutih te' loh te' dawa' nei nganak. Te' pah Lebui

**MAKLUMAT SELANJUTNYA BOLEH DIDAPATI DI:**

**KOLEKSI BORNEO**

Pusat Dokumentasi Melayu Tun Hamdan Sheikh Tahir  
Dewan Bahasa dan Pustaka Cawangan Sarawak,  
Jalan Tun Datuk Patinggi Haji Abdul Rahman Yaakob,  
Petra Jaya,  
93050 Kuching, Sarawak.

Telefon: 082 – 227 000  
Faksimile: 082 – 227 088  
E-mel: [eborneo@dbp.gov.my](mailto:eborneo@dbp.gov.my)

**“Memelihara Warisan Memupuk Wawasan”**

